

# NEWSLETTER

*decembar 2024.*



FONDACIJA  
HASTOR

*Maja Dukić*



# Liderstvo u praksi: Fondacija Hastor organizovala panel-diskusiju

U organizaciji Fondacije Hastor održana je panel-diskusija *Liderstvo u praksi* koja je okupila vodeće osobe ASA grupacije i stipendiste Fondacije Hastor.

Eldin Hadžiselimović, generalni direktor ASA grupacije, Samir Mustafić, predsjednik Uprave ASA Banke i Rasim Jusufović, predsjednik Uprave ASA Bolnice, u predivnom ambijentu ASA Instituta govorili su o liderstvu, poslovnom i ličnom uspjehu te vrijednostima koje ni u kojem slučaju ne smiju biti zanemarene.

Na početku panel-diskusije prisutne je pozdravila Lejla Đonlagić, direktorica Fondacije Hastor, dok je panel moderirala naša alumnistica Dženana Zulum.

Panel-diskusija omogućila je studentima stipendistima priliku da postave pitanja liderima vodećih kompanija u Bosni i Hercegovini te da dobiju savjete i primjere kojih će se sjetiti i godinama kasnije.

Kada je riječ o napretku u organizacijama, prof. dr. Rasim Jusufović, predsjednik Uprave ASA Bolnice, objasnio je napredak sa stajališta poslodavaca:

*Da biste napredovali u organizaciji, iza vas moraju stajati rezultati. U svim velikim kompanijama, kada dolazite na razgovor za posao, trenutno se traže dvije stvari: potencijal i spremnost za adaptaciju. To su ljudi koji traže potencijal i procjenjuju spremnost da, kada put bude krivudav i iziskuje adaptaciju, ste spremni snaći se i uspješno završiti posao.*



Gospodin Mustafić, predsjednik Uprave ASA Banke, motivisao je buduće lidere:

*Treba uvijek dati maksimum od sebe. Ne treba sebi postavljati ni niske gabarite, jer je to često naš problem. Mi moramo puno više u sebe vjerovati, a ne da će nam to neko izvana donijeti i da sve to može drugačije, bolje i uspješnije nego što to mi možemo.*

Vrijednosti ASA grupacije žive uprkos svim izazovima modernog društva. Poduzetnička kultura je u središtu svih aktivnosti, a sve ovo naši cijenjeni panelisti predano prenose na stipendiste Fondacije Hastor.



Gospodin Hadžiselimović zaključio je da je liderstvo stvar povjerenja i kontinuiranog ulaganja u sebe, što je preporučio i budućim liderima BiH. No, uz znanje, kućni odgoj i snalažljivost, ne smijemo dozvoliti da zaboravimo lijepe ljudske vrijednosti:

*Moramo iskazivati respekt prema ljudima koji su oko nas. Svi ljudi koje sretnete na vašem putu prema gore su ljudi koje ćete sresti na vašem putu prema dolje. Životni tok je takav i svi ćemo u nekoj fazi ići prema dolje, to nije upitno. Zbog toga je meni najvažnije da vidim da ste vi postali dobri ljudi.*

Bio je ovo još jedan iznimno koristan, zanimljiv i događaj ispunjen pozitivnom energijom.





# Fondacija Hastor u 2025. godinu ulazi bogatija za 130 novih stipendista: osigurane stipendije za učenike s područja pogođenih poplavama



Nakon što je Fondacija Hastor u oktobru ove godine sve svoje resurse stavila na raspolaganje stanovništvu s područja pogođenih poplavama, finalizirane su i procedure selekcije učenika s ovih područja za stipendiranje u školskoj 2024/2025. godini.

Naime, 130 učenika s područja općina Konjic, Jablanica, Mostar, Kiseljak, Fojnica i Kreševo, koje je zadesila teška prirodna nesreća, potpisivanjem svojih ugovora o stipendiranju zvanično su postali stipendisti Fondacije Hastor.

Vodeći se motom da je obrazovanje izbor pobjednika, Fondacija Hastor preko 18 godina reaguje na izazove obrazovanja i razvoja mladih u Bosni i Hercegovini ulažući u razvoj obrazovanja i pružajući kontinuiranu podršku učenicima i studentima kroz program stipendiranja i mentorski program, kojim će biti obuhvaćeno i 130 novih stipendista.

*Oni će, kao i svi naši stipendisti, pored kontinuirane finansijske podrške, imati niz benefita koje u Fondaciji Hastor omogućavamo našim stipendistima, a koji se odnose na prilike i mogućnosti koje*

*unapređuju znanje, pomažu razvoj vještina te stvaraju snažni networking.*

Fondacija Hastor se može pohvaliti da godinama unazad njeguje dobru saradnju sa svim nivoima vlasti te je, uz pomoć predstavnika općinske i kantonalne vlasti navedenih kantona dobila sve potrebne informacije zahvaljujući kojima se efikasno okončao sami proces regulisanja stipendiranja.

Ovo je samo jedan od svijetlih primjera kojima Fondacija Hastor pokazuje da srcem stoji uz građane Bosne i Hercegovine i da sve svoje aktivnosti usmjerava upravo na razvoj bh. društva:

*Fondacija Hastor će i u ovim, kao i u svim drugim okolnostima, ostati vjerni prijatelj svih građana Bosne i Hercegovine i dati svoj maksimum da našu društvenu zajednicu napravimo što boljom i ugodnijom za sve nas. Zajedno možemo pobijediti svaki izazov!*

Novim stipendistima Fondacije Hastor želimo srdačnu dobrodošlicu.






## Nova poglavlja, nove prilike: potpisani ugovori o stipendiranju s novim studentima stipendistima za akademsku 2024/2025. godinu

Nakon što smo u oktobru uspješno zaključili Konkurs za dodjelu stipendija studentima/cama za akademsku 2024/2025. godinu, krajem decembra upriličili smo i potpisivanje ugovora o stipendiranju novih studenata stipendista.

Prethodnih je godina kriterij Konkursa za stipendiranje studenata bio usmjeren prema studentima s iznimno visokim akademskim rezultatima, a iako idalje cijenimo izvrsnost u učenju, ove godine mogućnost apliciranja pružili smo za studente svih akademskih profila, bez obzira na prosjek.



Novi stipendisti Fondacije Hastor sada mogu očekivati dalji razvoj svojih akademskih i profesionalnih vještina kroz podršku Fondacije Hastor. Potpisivanje ugovora predstavlja prvi korak u zajedničkom putovanju, u kojem ćemo uz predanost i puni entuzijazma graditi temelje za uspješne karijere i društvenu odgovornost.

Nastavljamo pružati podršku mladim ljudima koji pokazuju želju za učenjem, rastom i doprinosom svojoj zajednici, a naš konkurs je samo još jedan korak ka tome.

Novim stipendistima Fondacije Hastor želimo srdačnu dobrodošlicu u našu veliku porodicu.

## Zajednički korak ka boljoj budućnosti: Planika Flex nagradila najuspješnije stipendistice Fondacije Hastor



Društveno odgovorna kompanija Planika Flex prepoznala je rad i misiju Fondacije Hastor i odlučila biti nam podrška na našem putu osnaživanja djece i mladih.

Stipendisti Fondacije Hastor marljivi su i talentirani mladi ljudi koji svojim znanjem i altruizmom značajno doprinose boljitku bosanskohercegovačkog društva. Njihov potencijal i želju za uspjehom prepoznaju filantropski orijentirane kompanije u BiH koje pružaju podršku i daju svojevrsan doprinos misiji Fondacije Hastor. Takva kompanija je i Planika Flex koja je skoro cijelo stoljeće aktivna na našim prostorima i čije je uspješno poslovanje postalo sinonim za kvalitet i komfor.

Posebno nas raduje da će upravo u tom kvalitetu i komforu uživati i stipendistice Fondacije Hastor, jer je Planika poklonila 55 pari prelijepog modela patika brenda *Bagatt* koje će biti uručene najuspješnijim i najvrednijim stipendisticama.

Ovakve geste prijatelja i donatora Fondacije Hastor nisu samo pokloni, već motivacija i snažna podrška mladim ljudima koji istrajno rade na stvaranju bolje budućnosti i, bez obzira na sve izazove modernog društva, nose istinske vrijednosti u sebi. Zahvaljujemo se Planici koja upravo takve vrijednosti prepoznaje i pruža nam značajnu podršku.



## Alumnisti Fondacije Hastor paketićima obradovali korisnike Dječijeg doma Bjelave, Sigurne kuće Sarajevo, Udruženja porodica sa četvoro i više djece „Budućnost 4“ Doboj i Dječijeg doma Mostar

Alumni Klub Fondacije Hastor organizirao je akciju spremanja novogodišnjih paketića za djecu dječijeg doma i Sigurne kuće na Bjelavama, Udruženja porodica sa četvoro i više djece „Budućnost 4“ Doboj i Dječijeg doma Mostar. Naš Alumni klub je snažna mreža prijateljstva i podrške. Članovi ovog Kluba su uspješni poslovni ljudi koji ujedinjuju snage, žive vrijednosti Fondacije Hastor i slijede njenu misiju.

Alumni klub Fondacije Hastor broji nekoliko timova koji su fokusirani na aktivnosti važne za rad Fondacije Hastor i cjelokupno bh. društvo. Jedan od takvih timova je i tim za humanitarne i ekološke akcije, čiji je fokus na implementaciji aktivnosti koje će jednokratno ili dugoročno pomoći društvenoj zajednici i njenom razvoju.

Povodom nadolazećih praznika ovaj je tim kontaktirao iznad navedene ustanove iz Sarajeva, Doboja i Mostara kako bi dobio konkretne informacije o potrebama njihovih korisnika, nakon čega se cijeli Alumni klub Fondacije Hastor ujedinio i napravio paketiće za djecu u kojima se nalaze stvari koje su potrebne i one koje će obradovati mališane.

Na ovaj način pomogli smo ispunjavanje potreba djece i izazvali osmijeh na njihovim licima.

Praznici su samo mali podsjetnik da smo jedni drugima važni i potrebni, a naša pokretačka snaga još je jednom pokazala da su prvenstveno dobri ljudi oni koji njeguju istinske životne vrijednosti.

**Svjetlo dobrote se  
ne gasi nikada  
ako svoj plamen  
dijelimo s drugima.**



# Deloitte održao radionicu za stipendiste Fondacije Hastor

Za kraj 2024. godine organizirali smo još jednu sjajnu radionicu i predavanje za stipendiste Fondacije Hastor. U saradnji s Deloittom održana je radionica o temi „Snažan lični brend mladih profesionalaca: LinkedIn, CV, intervju za posao“.

Tržište rada danas je izuzetno konkurentno, a pristigli CV na adresu potencijalnog poslodavca i sami intervju odlučujući su faktori u profesionalnom angažmanu. Svjesni značaja ove teme i kontinuiranog rada na njoj, okupili smo zainteresirane srednjoškolce i studente koji su imali priliku čuti praktične savjete o izgradnji ličnog brenda kroz kreiranje kvalitetnog CV-a, sadržaja na LinkedInu te pripreme za intervju za posao koji će im omogućiti da se istaknu u odnosu na ostale kandidate. O ovoj temi za stipendiste Fondacije Hastor govorila je Una Karabeg, marketing senior specijalista u kompaniji Deloitte BiH i alumnistica Fondacije Hastor.

Ulaganje napora za kontinuirani razvoj vještina i unapređivanje načina na koji se predstavljamo poslodavcima i društvu nije samo korisno, već i nužno za uspješan karijerni put i izgradnju ličnog brenda.

Zahvaljujemo se Deloittu i našoj alumnistici na sjajnom razgovoru i edukaciji.







# Mirza Rujanac



U ovomjesečnoj rubrici *Stipendista mjeseca* upoznajemo se s Mirzom Rujancem, mladim i talentiranim IT entuzijastom koji trenutno volontira u IT timu Fondacije Hastor gdje vrijedno, odgovorno i profesionalno pristupa unapređenju rada Fondacije Hastor zbog čega je zaslužio i titulu stipendiste mjeseca.

Mirza nam dolazi iz Donjeg Vakufa, gdje je završio osnovnu i srednju školu. Kako ističe, od samog je početka želio upisati IT smjer, ali taj smjer nije postojao u srednjoj školi koju je pohađao, pa je, kada je došlo vrijeme izbora fakulteta, odlučio upisati Fakultet informacijskih tehnologija u Mostaru. Kao dijete je posebno bio zainteresiran i oduševljen kompjuterima i njihovim mogućnostima, a tokom odrastanja želja za tim poslom bila je sve veća. U kompjuterima je, kako ističe, pronalazio zabavu i sreću, pa je želio i "zarađivati provodeći vrijeme za kompjuterom".

Mirza je trenutno na praksi u Njemačkoj. Otkrio nam je o kakvoj praksi je riječ i koji su njegovi glavni poslovni zadaci:

Uspjeh, naravno, ne dolazi preko noći. Mirza nam navodi kako je svojevrsna "tajna uspjeha" suočiti se sa strahom. Možda je neko od nas talentiraniji, međutim, disciplinom možemo postići šta zamislimo. Uspjeh nije rezultat onoga što radimo povremeno, već onoga što radimo dosljedno svaki dan.



*Moj savjet za mlade u Bosni i Hercegovini jeste da se trude, ne prestaju raditi i da ostanu istrajni na svom putu. IT se iz minute u minutu mijenja, dolaze nove tehnologije, potrebno je kontinuirano istraživati i pratiti trendove tržišta. Također, moramo izaći iz svoje zone komfora, donijeti neku tešku odluku, suočiti se sa strahom, jer se zaista takvi izdvajaju. Naravno, i ja sam bio potpuno nesiguran u svoje sposobnosti prije dolaska, međutim, suočio sam se s tim. Na kraju sam shvatio da nije bilo ništa strašno, već se taj strah i barijera nalaze u mojoj glavi.*

Mirza je mlad i ambiciozan IT entuzijasta koji kroz volontiranje i praksu stiče dragocjeno iskustvo koje će oblikovati njegovu karijeru. Njegov rad u međunarodnoj sredini i želja za učenjem novog pokazuje koliko je posvećen svojoj profesiji. Sigurni smo da će njegova budućnost u IT industriji biti kvalitetna i uspješna.

*Trenutno obavljam praksu kao softver developer u SAP-u, najvećoj softver firmi u Evropi. Moji zadaci su implementiranje, testiranje i održavanje funkcija na već postojećem proizvodu SAP-a, tzv. SAP Analytics Cloud (SAC). Moje iskustvo u Njemačkoj doista je fantastično, atmosfera u timu je vrlo podržavajuća, što mi omogućava da stalno napredujem.*



# Asmir Omerdić



Ovog mjeseca predstavljamo Asmira Omerdića, mladog i ambicioznog studenta koji dolazi iz Bihaća. Asmir je trenutno student treće godine Odsjeka za finansije na Internacionalnom Burch univerzitetu. U svojoj dosadašnjoj karijeri prošao je kroz razne uloge, od tutora engleskog jezika i košarkaškog trenera, pa do vođenja vlastitog biznisa. Trenutno se nalazi na završnoj godini studija i obavlja praksu u KPMG-u.

Asmir je oduvijek bio sklon poduzetništvu, a bez obzira na započeto obrazovanje u medicinskoj školi, njegova prirodna sklonost prema poduzetničkom razmišljanju odvela ga je u potpuno drugačijem smjeru. Prekretnica ka otvaranju biznisa dogodila se u srednjoj školi, kada je pokrenuo biznis prodaje parfema. Nakon što je ostvario svoju prvu zaradu, shvatio je da postoji ogroman potencijal u ovom poslu i odlučio ga proširiti. Pokrenuo je vlastitu prodajnu stranicu i usmjerio se na ključne lokacije u Bihaću, a već tada je znao da je poduzetništvo upravo ono čime želi biti prepoznat.

Iako je Asmir od malih nogu bio sklon poslovnim izazovima, duboko vjeruje u vrijednost volonterskog rada i zajedništva. Inspiriran izrekom koju je usvojio kao stipendista Fondacije – "Svjetlo dobrote se ne gasi nikada ako svoj plamen dijelimo s drugima" – Asmir smatra da volonterski rad

nije samo prilika za pomoći drugima, već i način za samorazvoj. Godinama je bio aktivan u više od 11 nevladinih organizacija, te su te volonterske aktivnosti bile znamenite pri oblikovanju njegovih ličnih i profesionalnih vještina. Svoj volonterski angažman uvijek je usmjeravao prema unapređenju zajednice i podizanju svijesti među mladima. Asmir ističe da je volonterski rad nevjerovatna prilika za razvoj "mekih vještina", kao što su timski rad, komunikacija i emocionalna inteligencija, dok je govornišтво najvažnija vještina za poslovni uspjeh.

***Naša sposobnost da jasno i uvjerljivo komuniciramo izravno utječe na to kako nas drugi percipiraju i kako gradimo međuljudske odnose. Najvažnije je pronaći stil javnog govora, a govor je najbolje započeti korištenjem humora, što pomaže stvaranju opuštenije atmosfere,*** zaključuje Asmir.

Na pitanje gdje se vidi u narednih deset godina, Asmir odgovara da sebe vidi kao ostvarenog konsultanta; na poslu gdje će iskoristiti svoje stečeno znanje i vještine za rješavanje poslovnih izazova. Smatra da se sjajna budućnost može dogoditi i u Bosni i Hercegovini bez odlaska "preko grane". Asmir istinski voli svoju domovinu i siguran je da nigdje nije kao kod kuće. Našim stipendistima i svim mladim ljudima poručuje:



***Iskoristite svaku priliku za razvoj, bilo kroz obrazovanje, volontiranje ili poduzetničke inicijative. Važno je prepoznati specifične prilike koje postoje za mlade preduzetnike, ali i ne treba čekati na priliku, nego ju stvoriti.***





# Nasir Kujraković

*Kada imate svoj san, morate ga čvrsto zgrabiti i nikad ga ne pustiti.* – Carol Burnett

U periodu školovanja, dok gradimo sebe i svoju ličnost, velika je prednost biti dio porodice Fondacije Hastor, ali zamislimo tek situaciju u kojoj se u budućnosti možemo pohvaliti ovom činjenicom. Činjenicom da iza sebe imamo jednu čvrstu podlogu koja nas je naučila pravim vrijednostima i poticala da postanemo što bolje osobe. Ovog puta u rubrici Alumni mjeseca donosimo priču Nasira Kujrakovića.

Nasir nam dolazi iz Gradačca, a stipendista Fondacije Hastor prestao je biti davne 2013. godine. U svom rodnom gradu završava osnovnu školu, zatim upisuje Tursko-bosanski Sarajevo koledž, a poslije i Fakultet elektrotehnike u Tuzli. Nakon završenog fakulteta, ponovo se seli u Sarajevo, gdje dobija posao kao softver inženjer. Odrastanje u velikoj porodici nije bilo lagano, prvenstveno jer su roditelji bili u lošoj finansijskog situaciji.



Najveći dio njegovog volonterskog rada bio je posvećen radu s učenicima:

*U volontiranju je bilo i lijepih i teških trenutaka. Naučio sam kako organizirati prostor i pripremiti se za časove. Pokušavao sam pronaći neku vezu s djecom, što nije uvijek bilo najlakše. Shvatio sam da je posao učitelja težak posao, i shvatio sam da to nije ono čime bih se ja mogao baviti u životu. Tako su Fondacija Hastor i volontiranje indirektno utjecali na moje buduće odluke u izboru profesije.*

Danas, ovaj 35-godišnji čovjek iza sebe ima preko deset godina iskustva u radu s razvojem softvera. Nakon dvije godine rada u Sarajevu dobio je poziv od prijatelja iz Njemačke koji je bio u potrazi za radnicima, pa je odselio u Njemačku, gdje i danas živi i radi na razvoju softvera za praćenje i kontrolu procesa pakovanja lijekova.

Pred sami kraj, Nasir je odlučio podijeliti jednu zanimljivost s nama. Odrastao je uz tri brata, roditelji su bili nezaposleni, a ipak je svaki od braće uspio ostvariti svoje snove i stvoriti bolju budućnost za sebe. Sva četiri brata postali su inženjeri – trojica elektorehnike, a jedan građevine.

Nasirova priča proteže se od jednog manjeg grada u Bosni i Hercegovini, preko Sarajeva, Tuzle i danas do Njemačke. Fondacija Hastor bila je uz njega onda kada je to bilo najpotrebnije, a on se odužio time što je postao uspješan čovjek kojem niti jedna prepreka ne može stati na put. S jednog poslovnog aspekta Nasir je dao kratku poruku našim stipendistima:

Članak pripremila: Aida Suljić

*Pri odabiru profesije pokušajte birati ono što volite ali i ono što je traženo na tržištu.*





## Pet minuta

Imam pet minuta za jučer  
 I pet minuta za sutra  
 Za sad imam čitave sate  
 Za sad godine imam  
 Za sutra nemam nijednog jutra  
 A ni za jučer nijednu večer

Imam par trenutaka da odvojim  
 Za ono što je prošlo i ne postoji  
 I par trenutaka da na sutra dam  
 Da ne bude da o tome ne razmišljam

Jer ja u tih par trenutaka svog sada  
 Mogu sebi stvoriti ljepša jutra  
 A neću moći ako mi je moje danas  
 Svedeno na jučer, svedeno na sutra

Ja neću da mi bilo šta drugo  
 Jače od mojih snova sija  
 Moj osmijeh vrijedi ko vedro nebo  
 Oči su mi svijetla galaksija

Pa zar da mi brige brišu boje  
 Pa zar da dozvolim takve stvari  
 Neću da tako stvari stoje  
 Vrijedni su moji memoari

Da danas pijem sekunde svoje  
 I neko da mi jučer u piće sipa  
 Neću dozvoliti takve ludosti  
 Loši su ukusi davne prošlosti

Da danas pijem sekunde svoje  
 I neko da mi sutra u piće sipa

Neću dozvoliti takve stvari  
 Od radoznalosti se brzo stari

A opet i ja dobro znam  
 Da piće pijem iz flaše dvije  
 Iz jedne koja je davno pukla  
 I druge koja ni otvorena nije

Sanita Fuško



## *Kako postati donator?*

Ukoliko želite podržati rad Fondacije Hastor, uplatu donacije možete izvršiti na jedan od transakcijskih računa:

**ASA Banka** d.d. Sarajevo:

1346101000825159

**Raiffeisen Bank BH** d.d. Sarajevo:

1610000055230065

**Unicredit Bank** d.d. Sarajevo:

3389002201775656



**FONDACIJA**  
HASTOR



### **Kontaktirajte nas!**

Bulevar Meše Selimovića 16,  
Sarajevo  
033 774 789  
033 774 823  
fondacija@hastor.ba



### **Redakcija**

Dženana Zulum  
Amina Bašić  
Aida Suljić  
Lorens Stranjak  
Lamija Sejdić  
Sanita Fruško



### **Grafički dizajn**

Adnan Kevrić



### **Naslovnica**

Nejla Dedić